

Not 11. 2186  
Dup cataloged L 20244  
no. 5

H A R A N G V E  
D E L' A M A T E V R  
D E I V S T I C E,  
A U X T R O I S E S T A T S.

---

M. D C. X V.

duplicate  
not cataloged.

H A R A N G V E  
*De l'Amateur de Iustice,*  
 A V X T R O I S E S T A T S.

C'Est de vous ( Messieurs ) que nous esperons que la iustice sera remise en la possession de son ancien patrimoine, d'où elle a esté honteusement banie par ceux de nostre siecle : C'est de vous que nous attendons le reſtabliſſement de son ancienne Nobleſſe enfermee dans les coffres de l'ignorance, liée & garottée d'une cheſne à la Perſienne: ſouuenez vous que c'est elle qui a fait autres fois florir toutes ces belles Republicques payennes, dont vous auez tiré vos loix, celle de Rome, d'Athene, & de Lacedemone ne ſont elles pas perdues en la perdant; prenez garde qu'il n'en arriue autāt à la voſtre, car elle commande à ſe laſſer d'endurer, ſi vous ne donnez ordre qu'elle ne ſoit remise en ſa premiere ſplendeur. Pleuſt à Dieu que ceux qui ſont pourueus de ſes offices, ſceuſſent bien pratiquer ces belles leçons, que Dieu leur a dictées par la bouche de ſes Prophetes & Apoſtres. Iuges, voyez ce que vous faites, car ce n'eſt point le iugement des hommes que vous exercez, mais celuy de voſtre Dieu, & ſelon que vous iugerez, ainſi ſerez vous iugez: Et de rechef, faites Iugement & Iuſtice, ou autrement j'ay iuré en moy que voſtre maiſon ſera deſerte. Elles leur ſeroient fort faciles à mettre en vſage, ſils auoient tant ſoit peu d'experience aux affaires, & ſuiuoient les loix: c'eſt à

dire si la loy dominoit, non pas eux la loy. Et à la verité nous dirons, que la Republique laquelle est la mieux ordonnee & policee, & celle en laquelle domine non tous indifferemment ou plusieurs, ains celle en laquelle la loy seule domine: car elle n'est iamais poussee d'aucune affection, elle ne se courouce point, elle ne hait personne, elle n'est point saisie d'ambition, elle aime tous également & les fauorise, & tandis qu'elle domine, elle n'endure point qu'aucun s'essue par ambition, pour conduire le peuple à son plaisir, mais elle gouuerne sagement la République: C'est pourquoy le Iurisconsulte Pomponius, l'appelle vne promesse & obligation commune de la Republique; & Aristote qu'elle est le commun consentement du peuple, lequel ordonne par escrit comme chascune chose se doit faire ou non faire: ainsi aussi Ciceron, qu'elle ordonne ce qui est iuste & bon, & deffend ce qui est mauuais: à quoy s'accorde ce que dit le Iurisconsulte Modestinus, que la force & vigueur de la loy est commander, deffendre, punir, & permettre. Et certes les Magistrats qui l'ont violee & violent encores tous les iours, doiuent bien penser que l'œil de la vengeance ne dormira pas tousiours. Ceux qui ont droit de iustice, comme plusieurs Seigneurs debuoiert bien cognoistre ceux lesquels ils commettent pour l'exercer: car de là vient vn grand bien à leurs subiects où vn tres-grand mal ainsi donc, Seigneurs, lors que les offices des Iuges vacqueront en vos iustices, donnez les places de iudicature à gens qui en soient capables & dignes, vous serez les premiers qui en recepirez les



fruits, & vos subiects les seconds. Dauintage vous ferez voir à nos Roys la faute qu'ils font de vendre les Estats, voire des premiers de leur Iustice, & non seulement des Iuges & iurisdiccions Royales, & des iuges Presidiaux, mais des Parlemens. Le Roy Loys douziesme en fit le premier l'ouuerture pour les Estats de la chambre des Comptes, le Roy François apres la suiui, pour tous les Estats de iudicature, mesme des Parlemens, celuy à qui nous nous ressentons tant redebua- bles d'auoir fauorisé les lettres en France. Et le Roy Henry le Grand, duquel les loüanges sont & seront à iamais espanduës iusques aux der- niers confins du monde, à la persuasion d'aucuns qui luy représenterent les grands deniers qui luy en viendroient les à rendus fiefs, faisant finan- cer par an aux Officiers le sixiesme de leur estat. Misérables qui tiennent des charges à ceste con- dition, qui acheptent le temps qu'ils consomment à seruir d'une somme qu'il faut qu'ils gagnent pour la payer, & si par ce moyen en rendant les estats, fiefs, c'est oster aux gens d'honneur le mo- yen de pouuoir seruir leur pays, & ouurir la porte aux ignorans, c'est à dire à ceux qui auront plus d'argent que de science. Helas où est-ce grand President la Vacquerie, pour nous en faire des Remonstrances, n'en naistra il point vn Phœnix de ces cendres pour nous entonner icy les dis- cours, & nous apprendre que ce n'est point l'or & l'argent qui maintiennent les Roys & leurs estats: mais ces deux colonnes, la pieté & la Ius- tice. Heureux ceux qui ont tellement gouverné leurs Prouinces qu'ils n'ont laissé apres eux au-

cun vestige d'auarice & luxure. rochez inacces-  
 sibles, forteresses imprenables & inexpugnables,  
 bouleuers de iustice, quand aurons nous l'heur  
 que nostre Roy vous appellera par vos capacités,  
 suffisances, bonnes mœurs, & grande experience  
 aux affaires: afin d'amanter toutes sortes de moy-  
 ens fort propres à tirer la verité du milieu des  
 tenebres, discerner le iuste de l'iniuste, garentir  
 les vesues & Orphelins de la foule & oppression  
 des profanes & impies. Les reformatiōs commā-  
 cent quelques fois par les parties les plus basses.  
 doncques (Seigneurs) à qui le Roy a concedé les  
 Iustices, ne cerchés les officiers du Roy dans les  
 Iurisdicțiuni, qui remplissent leurs sieges des ap-  
 pellations des sentences qu'il auront eux mes-  
 mes données, pour se faire recepuoir plusieurs  
 fois aux parties & y profitent en diuers temps;  
 ny admettés point aussi des Procureurs, des Sie-  
 ges: car ils n'auront que l'habit des Iuges, qui est  
 la robe qu'ils y porteront aux iours qu'ils iront  
 exercer leurs charges, & peut estre qu'encores ils  
 auront apprehension, d'enueloper leur ignoran-  
 ce d'une soutane & d'une robe: croyés moy ce sōt  
 tous vautours enrobés, monstres diformes, hor-  
 ribles & execrables, ayant bien au dehors la figu-  
 re d'hommes, mais en effect & au dedans, ce sont  
 des vrayz toreaux, des loups affamés, des bestes  
 farouches & sauuages, qui se repaissent incessam-  
 ment de chair humaine, escorchent le pauvre  
 peuple, le succent iusques aux entrailles, foulent  
 le iuste & l'innocent, tantost par faux contracts,  
 tantost par mutilations des registres, tantost par  
 concussions & exactions tres-pernicieuses nous

voyons pratiquer cela tous les iours à nostre  
 grand regret, qui me meut de représenter icy les  
 qualités d'un bon iuge, pour le choix que vous  
 en ferez quand l'occasion s'en presentera, aucuns  
 ont depeint la iustice couuerte d'un grand voile  
 & sans yeux, enquoy il me semble qu'ils luy font  
 iniure : car sur toutes choses cèluy qui est iuge,  
 doit auoir les yeux clairs, voyans fermes & as-  
 surez à la terreur des meschans : mais peut estre  
 qu'ils ont voulu dire, que le Iuge ne doit se sou-  
 cier des menaces, ny des prieres des grands, de ses  
 parens, ny de ses amis, & qu'il doit destourner  
 d'eux les lumieres chastes de la Iustice, de crainte  
 que ses yeux ne soyent esblouis & ne conuiēt, par  
 ce qu'il doit faire iugement du bien d'avec le  
 mal, & des innocens d'avec les coupables, qu'il  
 ne se laisse point corrompre, par les esperances,  
 faueurs, proffits & telles autres especes de char-  
 mes plus dangereux que ceux des magiciens, que  
 leurs yeux ne soyent point surpris, constants &  
 asseurés comme ceux de Socrate, quand sans fil-  
 ler il regardoit le soleil, c'est à dire, Dieu du chef,  
 duquel la iustice est née, le gournail & condui-  
 cte de laquelle il a commise au Iuge, ainsi Qu'a-  
 Enée son vaisseau à Palinurus, qui pour si peu  
 qu'il se descouure de l'equité, tombera precipité  
 entre les Hyrtres & les rochers, ses yeux aussi peu  
 desirans que ses mains continantes ainsi que di-  
 soit Pericles, habillé modestement d'habits de-  
 ceus à sa charge, incorruptible, aueugle aux pre-  
 sents, qu'il soit tellement esgal enuers yn chacun,  
 qu'il puisse iuger sans passion, & que la raison luy  
 soit comme en la main le baston à l'aveugle, du-



quel il tatonne s'il n'y a point de pierre en son chemin contre laquelle il offense & blesse son pied : que selon Solon il aye les oreilles fort ouvertes, à celle fin de s'accoustumer à qui bien ou mal dire de luy, & ne fust esmeu des louanges ou des médisances du vulgaire, & mesme quelquefois à la façon d'Ullisse, il se boucha les oreilles de cire, & quelquesfois d'estre sourd, mais non lors qu'il exerce sa charge : bref estre tel que Perse le d'espeint en ces vers.

*Ille sciat iustum, gemina suspendere lance  
Ancipitis libra, rectum discernat, ubi inter  
Curva subit, vel cum fallit pede regula varo  
Sitque potis nigrum vitio presigere Theta.*

Au surplus, nous donnons aussi l'advis de Ciceron en son Oraison *pro Cluentio*; *nee lentum nimis etiam esse debere, ne litium faciat immortalitatem, neque frigidum nimis in delictis plectendis purgandaque scelestis hominibus civitate* : mais nous voulons que le Juge viue avec une ame innocente, qu'il n'apprehende point la peine, qu'il ne soit point paresseux, ny qu'il se laisse trop aller, qu'il ne se face aussi trop redoubter, qu'il ne soit audacieux, mais bien temperé, qu'il ne soit trop precipitant, ne aussi trop estourdi, qu'il ne se laisse emporter à la collere, ny a trop grande compassion, qu'il ne se laisse fleschir, qu'il soit tousiours ferme, qu'il ne se laisse suborner : bref qu'il soit aussi homme de bien & aussi sage que celui, lequel a peine Apollo peut il trouver entre mil. Quand nous le voudrons choisir, il ne faut point que nous ayons autrement esgard à sa parenté à son estre & créatio : mais seulement que nous regardions s'il a esté nourry



nourri & allaité du lait des mammelles de Iustice, laissant là les moyens qui ne sont que choses terrestres, caducs & perissables. Imitons ces anciens payens, lesquels estoient tous zelateurs de Iustice, ne la laissant point à l'abandon de qui la vouloit, ne l'exposoient point à l'encan, comme nous semblons faire auourd'huy à toute sorte de personnes, ainsi qu'une marchandise, dont on ne fait pas grand compte. Allexandre Seuer Syrien de nation, bon Prince, guerrier, iusticier, pieux, & le premier Empereur Christicolle apres Adrian, n'a iamais permis, ne voulu souffrir, que les Estats de Iudicature se missent en vente, *ne cesse est ( inquit ) ut qui emit vendat : ego non patiar mercatores potestatum, quos si patiar damnare non possim : Erubesco enim punire illum hominem qui emit & vendit.* Voilà de belles paroles dignes certes d'un tel Prince, lesquelles peuuent servir d'exemples à nos Roys, qui maintenant ne scauroient auourd'huy punir iustement ceux qui ont charge sur un peuple, s'ils commettent quelque iniustice, par ce que l'on peut dire que ce sont eux mesmes, qui leur en donnent le subiect, mettants en vente leurs Estats de iudicature, les deliurants aux plus chers & derniers enchérisseurs, qui le plus souuent sont enfans de Marchans, qui n'auront iamais esté nourris en l'Eschole de vertu, & lesquels osent bien mettre tout leur auoir, ou bien peu s'en faudra en des Estats, pour exercer toute leur vie contre leurs consciences toutes sortes d'impietés, ne se proposans, ne liberté, ne vertu pour leur but: ains seulement une conuoitise de cheuances, auoir, & richesses, laquelle n'a borne ne mesure quelconque, ne aucun assouissement, non plus qu'un feu bien embrasé, ou un creux abis-

me de mer, l'un & l'autre infatiables de tout ce qui se peut mettre dedans. Mais le pis que ie voy, c'est que la plus part deux, sont ordinairement alliés les uns avec les autres, de sorte que si quelqu'un deux a delinqué, il est impossible d'en esperer la punitiō, & moins encores d'auoir Iustice, si on a quelque chose a desmesler auēc eux, & si on en veūt recuser vn, il faut par mesme moyen recuser tout le siege, comme nous voyons cela arriuer souuent. Es Estats du païs de Languedoc tenus à Montpellier, en l'an mil D. lvi. il fut arresté de remonstrer au Roy, qu'il luy pluist ordonner, que les proches parens & alliez ne fussent admis en mesme siege ny en mesme court: Et quatre ans apres, les mesmes remonstrances furent faictes au Roy par les Estats de France tenus à Orleans, mais il est impossible d'y remedier maintenant, tant que les Estats soient perpetuels, & conserués par la Paulette. Il y a deux cens cinquāte ans & plus que le Roy Charles cinquieme, & auparauant luy Philippe le Bel, Auoiēt ordonné que nul ne fust Iuge au pays de sa naissance, conformément à l'Edit de Marc Aurele, lequel ordonna que nul ne fust Gouverneur de son pays, ce qui fut depuis estendu auz conseillers assesseurs & Gouverneurs des Prnuinces, & fut tres-bien executé: comme il est encores en Espagne, & en la plus part des villes d'Italie, le Iuge ordinaire est estranger. Il y a quelque temps qu'aux Estats de Poulougnē, les Ambassadeurs de Moschouie requierent la mesme chose: mais l'ordonnance de nos Roys a esté tost enseuelie. Et sans chercher les Edicts des Empereurs Romains, ne lisons nous pas dans les memoires de Cesar, que les anciens gaulois, & mesmes ceux d'Autun auoient vne loy inuiolable, qui

deffendoit que les Magistrats fussent continués plus d'un an & que deux d'une famille ne peussent estre Magistrats, ny Senateurs ensemble, ny l'un tant que l'autre qui l'auroit esté viuroit. D'avantage la chose qui plus doit estre recommandee à tous subiects en general, & à chacun en particulier, est la conseruation du bien public. Et quel soin, quel soucy du biē public, peuuēt auoir ceux qui ny peuvent auoir aucune part? comment auront ils soin de ce qui ne leur touche ny pres ny loin? Et si quelque homme de bien veut dire, faire, & entreprendre quelque chose pour l'vtilité publique, estant priué qui l'escouterà? qui le suportera? qui le fauoriserà? les hystoires nous aprenent, que presque tous les Estats populaires ont esté changés en Monarchies, pour auoir donné les charges & commissions plus long tēps qu'il n'estoit besoin: comme à Pisistrate en Athenes, à Phidon en la ville d'Argos, à Cypsele en Corinthes: à Denys en Syracuse: à Pance en Leonce, à Phalaris en Ionie: & sans aller si loin d'où sont venus tous les Princes & Seigneurs d'Italie, sinon que de là: ainsi que ces iours passés nous l'auons faict voir en certaines remonstrances. Ce que preuoyant le dictateur Aemilius Mamercus, presenta requeste au peuple, qui passa en force de loy, par laquelle il fut ordonné que la censure des lors en auant prendroit fin en 18. mois, qui estoit establie pour durer cinq annees, & le iour suiuant il deposa la dictature ne la voulant continuer plus d'un iour, & adiousta ceste raison, *vt Sciatis quam mihi diuturna imperia non placeant*, Et à peu de temps delà, nous lisons que le Tribun gabinus fut tué en plein Senat par les Senateurs mesmes, comme nous lisons en Dion, pour auoir fait decerner à



Pompee la commission de la guerre Piratique pour cinq ans: & rend la raison pourquoy il est fort dangereux d'oſtroyer les charges honorables trop long temps, parce [dit-il] que le naturel de l'homme est tel, qu'il mesprise vn chacun, & ne peut viure en subiect, depuis qu'il a long temps commandé: c'est ce que dit Cassiodore quasi en mesme sens, *Antiquitas voluit prouinciarum dignitatem annua successione reparari ut nec diutina potestate vnus insolesceret, & multorum prouectus gaudia reperirent.* Et peut estre que ce fut l'yn des plus grands moyens de conseruer l'Estat des Assyriens & Persans, qui tous les ans changeoient de Capitaines & Lieutenans. Et cependant aujourd'huy nous voyons que les enfans par le moyen du droit annuel, sont maintenus & gardés en la possession des Estats de leurs peres, quelle folie ie vous prie: le pere peut estre sera meschant & scauant, & le fils ignorant sera en sa place: de sorte que tous les iours nous tombons de siebure en chaud mal, de dire qu'il ne sera receus s'il est ignorant, c'est s'abuser: veu qu'autant en pend à l'œil de ceux qui le reçoient ayant peut estre des enfans de telle Cathégorie, qu'ils veulent pouruoir semblablement auant ou apres leur mort. O que les republicques sont heuruses quand elles sont gouuernees par gens de bien, prudens & scauans: car où la sapience est, la iustice ne s'en peut pas esloigner, & ainsi il ne s'y peut rien faire d'iniuste ny de Tyrannie, mais où l'ignorance est, & le deffaut d'experiance, ce ne sont qu'arrogances, audaces, pratiques de toutes choses contre tout droit & raison (ce qui estoit reproché aux Atheniens vn ardent desir & appetit insatiable de gain) tout y est en desordre, d'autant que si le iuge ignorant ayme



aujourd'huy quelqu'un, il le fauorifera, mais si le  
 lendemain il luy à faict la moindre offense, il le  
 condamnera, & n'y a aucun qui ne puisse faire de  
 telles fautes, s'il est ignorant des loix & des sciences  
 & qu'il ayt ceste opinion d'estre la loy mesme, de  
 cela qu'il a puissance de iuger. Certes le gouuernement  
 de tels iuges & Magistrats est tres dangereux,  
 parce qu'ils foulent les plus nobles, & mesprisent  
 les vertueux & sçauans, les vns estants poussez d'a-  
 mour, de haines, d'animosités, ou de quelques af-  
 fections particulieres, les autres d'esperance, de  
 crainte, d'ambition ou d'auarice, iugent ie plus sou-  
 uent ce qui est inique, & ainsi ils ne sement toute  
 leur vie, (comme dit le sage) que peruersité, mais  
 aussi ils doiuent sçauoir qu'ils en moissonneront le  
 tourment, & que la verge de leur indignation pré-  
 dra fin. Vous aurés donc (Messieurs) assez d'affai-  
 res aux Estats, si vous voulez apporter vne refor-  
 mation à la Iustice, que de parler de tels officiers,  
 telle corde mérite bien d'estre touchee & à besoing  
 d'estre mise en bon ton, vous trouuerrez assez en  
 France à qui commettre le maniemēt des affaires,  
 nous auons encores, Dieu mercy, bon nombre de  
 personages, doctes & vertueux, nos prouinces, nos  
 villes, vous en fourniront assez. Estant chose cer-  
 taine & sans doute, que de gens de bien, & entiers,  
 il ne sçauroit sortir, ny esclorre autre chose que de  
 bons conseils & aduis. Nous trouuerrons si nous  
 voulons des Fabrices, des Publicoles, des Curies,  
 des Calatins, des Cecinnates, des Attilles, pour les  
 faire asseoir sur le Throſne de la Iustice, & lesquels  
 prefereront tousiours leur particulier au public.  
 Helas bon Dieu! ne sçaurions nous veoir vne telle  
 reformation en nostre pauvre Frâce, n'aurons nous

iamaïs cet heur que de veoir les Estats non plus ve-  
 naux. C'est de vous (Messieurs) que despendent  
 telles affaires pour le bien de l'Estat. C'est à vous de  
 remonstrer au Roy les maux que nous endurons  
 tous les iours de ce costé là. Vous voyés comment  
 ceux d'aujourd'huy à cause de la cherté de leurs of-  
 fices, vendent la Iustice, vendent les Republiques,  
 vendent le sang du paünre peuple, vendent les  
 loix aussi, & consequemment ostent les loyers  
 d'honneur, de vertu, sçauoir, pieté & de Religion,  
 ouurants en plain iour la porte aux larcins, aux con-  
 cussions, à l'auarice, Iniustice, ignorance, à l'impie-  
 té & à tous vices & ordures. Voila en vn mot que  
 c'est que de la pluspart de nos iuges, & desquels  
 Horace à tres bien sçeu dire, *Malè verum examinant*  
*omnes corrupti iudices*, ie dis la plus-part: car ie ne dou-  
 te point qu'il n'y en ait encores d'enr'eux, qui ré-  
 grettent de voir telles choses: mais quoy? que peut  
 faire vn petit nombre, entre tant de corrompus, si-  
 non que d'auoir recours à Dieu, & le prier d'auoir  
 pitié de son peuple desolé, affligé, foulé, & ruiné  
 par ceux qui ont l'authorité sur luy, où bien au-  
 ctorisent ceux qui commettent telles impietez,  
 sans se soucier du iuste, sans supporter la veufue,  
 l'orphelin, sans reprimer l'insolence des vns & des  
 autres, sans guerdonner la vertu & integrité de  
 ceux qui le meritent. Ce sont à proprement parler  
 torrens de nature desbordée & accessiue, lesquels  
 apres auoir rompu la leuee d'equité & de bonté,  
 viennent à s'espandre parmy les campagnes, rau-  
 ger pour vn temps les semences de iustice, atterrer  
 les moissons toutes entieres, iusques à ce que fina-  
 lement ils se vont perdre & précipiter dans cét a-  
 bisme espouuentable duquel parle Virgile.

*tenent media omnia Sylua*

*Cocitus-que Sinus Labens circumfluit atro.*

Par faute de voir bien à l'œil ceste iustice diuine, laquelle avec des yeux en plus grād nombre Qu'argus, penetre au dedans de leurs pensées profanes, & à la mienne volonté que ces gēs là se voulussent vn peu arrester à cōsiderer, qu'elle a esté ceste iustice si curieusement obseruee par le paganisme, ils n'y trouueroien tque toute equité & droiture, nous en auons encores leurs loix, lesquelles sont plus diuines qu'humaines. D'auantage, s'ils vouloient s'enquerir où est ce grand Alexandre ce grand Cesar, ce grand Charlemagne, & tant d'autres Roys, ils seront estonnés de se souuenir quels ont esté leurs Estats, ce Lyrique payen a bien chanté leur honneur.

*Nullus argento color est avaris*

*Abdite terris inimica Lamna*

*Crispæ salusti nisi temperato*

*Splendeat vsu.*

Qui consistoit principalement en effects charitables, l'vn desquels & le principal estoit d'auoir l'affection vers les pauvres, les soustenir, & par aumosnes releuer leurs necessités; ainsi en doibuent vser ceux qui ont auctorité sur vn peuple, escouter la plainte d'vn pauvre plustost que celle d'vn riche, c'est à dire le preferer sans tant le faire demeurer à leur porte, non tant sous esperance de gain que pour l'amour de la vertu: imitans en cela Traian ce grād Empereur Iusticier, lequel est a bō droit loué des historiens, de ce qu'estant à cheual pour aller à la guerre, il mit pied à terre pour ouyr la plainte que luy vouloit faire vne pauvre femme. Bel exemple certes pour ceux qui se meslent de gouver-



ner la iustice, lesquels s'ils veulent faire le semblable, c'est à dire, s'ils sont amateurs d'équité & zélateurs de iustice, ils doibuent auoir esperance certaine de ne mourir iamais que pour viure dans le Ciel. Pour conclusion suiuous tousiours la Iustice, reestablishons là comme elle estoit du temps de nos anciens peres, embrassons là, sans en iamais quitter la prise, à l'exemple de ces grands personnages Payens, lesquels biē qu'ils n'eussent la vraye cognoissance de nostre Dieu: toutesfois il s'est seruy deux, pour faire admirer sa bonté & iustice, par des gens bien versés, & qui ont laissé apres eux vne memoire eternelle de leurs actes vertueux à tout le genre humain faisons eslection de gens suffisans & capables, soit en exemple de bonne vie pour l'administrer: n'allons point chercher ceux qui n'ont que la bourse en la main & rien autre chose pour leur donner des charges, afin de se faire bonneter, craindre sans raison, & exercer toutes sortes d'impietés, mais ceux là tant seulement, *Quorum Spectata & nobilitata virtus non solum natura corroborata, sed etiam disciplina putabatur*, & lors ce sera la vraye guerison de l'Estat, n'y ayant rien plus necessaire en ce monde, que de bons officiers doués de science & sagesse, afin de biē conduire & ordonner la vie humaine à sa propre & heureuse fin, & lesquels seront curieux de rapporter tout leur soin & industrie, pour la conduicte d'icelle, au bien & vtilité publique, afin d'en remporter aussi pour eux mesmes, vne loüange, gloire, & reputation immortelle.